

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 3. August 2022

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här Staatsminister, den Här Bausseminister an den Här Vizepremierminister Bausch weiderzeleeden.

Am Artikel "Luxemburgs Agenda bei der UNO: unbekannt und einseitig", deen den 30./31. Juli am Wort publizéiert gouf, heescht et, datt Lëtzebuerg am UNO-Mënscherechtsrot während de mëndlechen Interventiounen dacks eesäiteg israelfeindlech Positione vertritt, déi sou vu kengem aneren EU-Memberstaat gedeelt ginn. Sou legitiméiert Lëtzebuerg beispillsweis regelméisseg duerch an a séngen Interventiounen den "Item 7" deen eesäiteg Mënscherechtsverletzungen duerch Israel an de Palestinensergebidders thematiséiert. Dem Artikel no ass Lëtzebuerg nieft Irland dat eenzeg aner EU-Land, dat während de leschten dräi Joer zu dësem festen Dagesuerdnungspunkt d'Wuert ergraff huet, huet am Géigesaz zu Irland awer op eng Verurteilung vu Mënscherechtsverletzungen déi duerch palestinensesch Autoritéite begaange goufen, verzicht.

Weider heescht et am uewen zitéierten Artikel, datt Lëtzebuerg den 23. Juli 2019 eng Resoloutioun matgedroen huet, déi Israel als eenzegem Land schwéier Verstéiss géint d'Rechter vun der Fra virgeworf huet an domat méiglech Verletzungen vu Fraerchter an anere Länner stëllschweigend guttgeheescht hätt. Am Kontext vun der UNO-Fraerrechtspolitik wäert den Artikel ausserdeem Hiweiser aus, datt Lëtzebuerg d'Kandidatur vum Iran an d'UNO-Kommissioun fir Fraerchter mat ënnerstëtzt hätt, obwuel och dëst Land ëmmer rëm wéinst méigleche Verstéiss géint d'Rechter vun der Fra an der Kritik steet.

An deem Zesammenhang géif ech der Regierung gär dës Froe stellen:

- 1) D'UNO fällt an de Kompetenzberäich vum Här Bausseminister. Ass déi am Artikel thematiséiert israelfeindlech Haltung vun eisem Land op eng unilateral Decisioun vum Här Minsiter fir Baussepolitik zeréckzeféieren oder entsprécht se där offizieller Position vun der ganzer Regierung?
- 2) Kann d'Regierung präziséieren, wéi wäit déi uewe beschriwwen Decisiounen am Kader vun der UNO-Fraerrechtspolitik der Linn vun där nationaler, sougenannter "feministescher Baussepolitik" entspriechen?
- 3) Huet Lëtzebuerg an dene leschte Joren Kandidature vum Iran fir UNO-Gremien ënnerstëtzt? Wa jo, wéi eng woren dat? Huet Lëtzebuerg fir den Iran als Member vun der UNO-Kommissioun fir Fraerchter gestëmmt?

Mat déiwem Respekt,



Fernand Kartheiser  
Deputéierten



**Äntwert vum Här Aussen- an Europaminister op d'parlamentaresch Ufro n° 6602, deposéiert den  
3. August 2022 vum honorabelen Deputéierten Här Fernand Kartheiser**

**1) D'UNO fällt an de Kompetenzberäich vum Här Bausseminister. Ass déi am Artikel thematiséiert israelfeindlech Haltung vun eisem Land op eng unilateral Decisioun vum Här Minister fir Baussepolitik zeréckzeféieren oder entsprécht se där offizieller Positioun vun der ganzer Regierung?**

Weder de lëtzebuenger Ausseminister, nach d'lëtzebuenger Regierung huele bei der UNO eng "israelfeindlech Haltung" an. Als Member vum UNO Mënscherechtsrot erënnert Lëtzebuerg, wann et néideg ass, dorunner, dat all Länner – och Israel – obligéiert sinn, am Aklang mam Vëlkerrecht – an dozou gehéiert och dat humanitært Vëlkerrecht – ze handelen.

**2) Kann d'Regierung preziséieren, wéi wäit déi uewe beschriwwen Decisiounen am Kader vun der UNO-Fraerechtpolitik der Linn vun där nationaler, sougenannter "feministescher Baussepolitik" entsprechen?**

An der erwäntener Resolutioun vum Sozial- a Wirtschaftsrot vun der UNO geet et ëm d'Situatioun vun de Palestinenserinnen an déi international Hëllef u si. An deem Sënn ass dës Resolutioun am Aklang mat de Prinzippe vun der lëtzebuenger feministescher Aussepolitik, no där d'Fraerechter e vollwäertege Bestanddeel vun de Mënscherechter sinn. An deem Kontext sief och un d'Decisioun vun der lëtzebuenger Regierung erënnert, de Kampf géint all Forme vun Diskriminatioun – och a besonnesch géint Fraen a Meedercher – als eng vu véier Prioritéite während hirem Mandat am UNO Mënscherechtsrot ze behandelen.

**3) Huet Lëtzebuerg an dene leschte Joren Kandidature vun Iran fir UNO-Gremien ënnerstëtzt? Wa jo, wéi eng woren dat? Huet Lëtzebuerg fir den Iran als Member vun der UNO-Kommissioun fir Fraerechter gestëmmt?**

Als Land mat enger feministescher Aussepolitik leet Lëtzebuerg vill Wäert op de Respekt vun der Fraerechter am UNO-System. Dëst zielt selbstverständlech och wat d'Walverhale vun eisem Land an der UNO betrëfft. Iwwert seng individuell Ofstëmmunge bei geheime Wale kommunizéiert Lëtzebuerg net.

Lëtzebuerg, 1. September 2022  
(s.) Jean Asselborn  
Aussen- an Europaminister